

Апостол 03.11.2024

Б: Мир всем.

Я: И духови твоему.

Б: Премудрость.

Я: Прокимен глас 2: Крепость моя и пение мое
Господь, / и бысть мне во спасение.

Хор: Крепость моя и пение мое Господь

Я: Наказуя наказа мя Господь, смерти же не предаде
мя.

Хор: Крепость моя и пение мое Господь

Я: Ин Прокимен, глас 7:

Я: Честна пред Господем / смерть преподобных Его.

Хор: Честна пред Господем

Б: Премудрость.

Я: к коринфяном послание святаго Апостола Павла
чтение.

Б: Вонмем

Братие, Бог и Отец Господа нашего Иисуса Христа
весть, сый благословен во веки, яко не лгу. В Дамасце
языческий князь Арефы царя стрежаше Дамаск град,
яти мя хотя, и оконцем в кошнице свешен бых по стене,
и избегах из руку его. Похвалитися же не пользует ми:
прииду бо в видения и откровения Господня. Вем
человека о Христе, прежде лет четыренадесяти, аще в
теле, не вем, аще ли кроме тела, не вем, Бог весть,

восхищена бывша таковаго до третияго небесе. И вем
такова человека, аще в теле, или кроме тела, не вем, Бог
весть, яко восхищен бысть в рай, и слыша неизреченны
глаголы, ихже не леть есть человеку глаголати. О
таковем похваляюся, о себе же не похваляюся, токмо о
немощих моих. Аще бо восхощу похвалитися, не буду
безумен, истину бо реку: жажду же, да не како кто
вознепщует о мне паче, еже видит мя, или слышит что
от мене. И за премногая откровения да не
превозношуся, дадеся ми пакостник плоти, аггел
сатанин, да ми пакости деет, да не превозношуся. О сем
трикраты Господа молих, да отступит от мене, и рече
ми: довлеет ти благодать Моя: сила бо Моя в немощи
совершается. Сладце убо похваляюся паче в немощех
моих, да вселится в мя сила Христова.

*(2 Кор 11:31–12:9, зач. 194)

Братие, сеяй скудостию, скудостию и пожнет, а сеяй о
благословении, о благословении и пожнет. Кийждо
якоже изволение имать сердцем, не от скорби, ни от
нужды: доброхотна бо дателя любит Бог. Силен же Бог
всяку благодать изюбиловати в вас, да о всем всегда
всяко довольство имуще, избыточествуете во всяко дело
благо, якоже есть писано: расточи, даде убогим, правда
его пребывает во век века. Даяй же семя сеющему и
хлеб в снедь, да подаст и умножит семя ваше, и да
возрастит жита правды ваша, да о всем богатящися во
всяку простоту, яже содевает нами благодарение Богу.

*(2 Кор 9:6–11, зач. 188)

Б: Мир ти.

Я: И духови твоему.

Б: Премудрость.

Я: Аллилуиа глас 2

Я: Услышит тя Господь в день печали, защитит тя имя
Бога Иаковля.

Хор: Аллилуиа 3 раза

Я: Господи, спаси царя и услыши ны, в онъже аще
день призовем Тя.

Хор: Аллилуиа 3 раза

Я: Блажен муж, бояйся Господа, в заповедех Его
восхощет зело.

Хор: Аллилуиа 3 раза